

Seni Preseten Thomas S. Monson



# Ewe Niffangen Aier

“**W**isach pwe sipwe ochuno seni ukukoch ngeni angangoch, seni nipwakingaw ngeni nipwakoch,” Preseten Thomas S. Monson a aitikich. “Ach angang pwe sipwe winiti muri-noch. Ew me nein an Kot kewe niffang mi nap ngeni kich ina ewe pwapwan achocho sefan, pun ese wor nipwakingaw epwe ina amwuchunon.”<sup>1</sup>

Sia kan soun anono fengeni ewe poputan ew minafon ier ngeni ekkewe mettoch sia mochen fori me met sipwe angang ngeni. Sia apungano pwe sipwe murinono, sipwe siwin, me sosoch sefan. Menin ewe napanap mi kon auchea ren ach sipwe sosoch sefan epwe ren ach aucheani met Preseten Monson a eita ngeni “ewe niffangen aier.”<sup>2</sup>

Non ewe kinikinin mak mi nom fan seni an afanafan nupwen a winiti Presetenin ewe Mwichafen, Preseten Monson a aurora kich sipwe “aea ewe achasefanin ewe chan Kraist pwe am pwe tongeni angei omusomusen am kewe tipis, me netipem repwe tongeni nimenimochuno.”<sup>3</sup>

## Ewe Manamanen Omusomus

“Kich meinisin sia fen fori finiach mi muan. Ika sise mwo apungu finiach kewe, ua ennetin apasa pwe mi wor ew aanen sipwe fori. Ewe mwokutukut ina a iteni aier. Ua sio ngeni kemi oupwe apungu ami kewe muan. Ach Chon Amanau a mano pwe epwe awora ngeni kemi me ngang ena niffang. Ina mwo ewe aan ese mecheres, ewe pwon mi ennet: ‘En ka anueparapar ren tipis, nge kopwe nimenimoch ussun chok snow’ [Isaiah 1:18]. Iwe Ngang, ewe Samon, usap chiwen chechemenir [D&C 58:42]. Kosap

efeiengawa om manau esemuch. Ika ka fen tipis, om chok mwitir ne niwin sefan, epwe mwitir kopwe kuna ewe kinamwe mi ngarangar me pwapwa epwe feito fiti ewe manamanen omusomus.”<sup>4</sup>

## Niwin ngeni ewe Aan

“Ina mwo pwe mi namwot sipwe finata mettoch fiti mirit, mi wor ekkoch fansoun nupwen sipwe finata mettoch mi tiparoch. Ewe niffangen aier, seni ach Chon Amanau, a atufichikich ach sipwe awena ia sia feino ia, pwe sipwe tongeni niwiniti ewe aan minne epwe emweni kich ngeni ewe ningen selestial minne sia kutta.”<sup>5</sup>

## Ewe Aanen Niwinsefan

“Ika emon neimi a fen turuno non an sai, ua ennetin apasa ngeni kemi pwe mi wor ew aanen niwinsefan. Ewe mwokutukut ina a iteni aier. Ina mwo ewe aan mi weires, ami manau esemuch a anongonong won. Met epwe kon nap tufichin ngeni ami achocho? Ua sio ngeni kemi pwe oupwe finata me ikei me iei ne fori ekkewe tetten mi auchea ne ennetin aier. Ren ami mwitir fori, epwe mwitir ami tongeni mefi ewe kinamwe me ewe mwosonosonun me ennet Isaiah a apasa [ngeni Isaiah 1:18].”<sup>6</sup>

## Aramas mi Tongeni Siwin

“Mi namwot pwe sipwe sinei pwe aramas mi tongeni siwin. Repwe tongeni poutano ar kewe fofforingau. Ra tongeni aier seni tipis. Repwe tongeni fich ngeni ne angei ewe pristut. Me repwe angang weires fan itan ewe Samon.”<sup>7</sup>

## Winiti mi Nimoch Sefan

“Ika mi wor mettoch mi muan non manauom, mi wor eu tufich om kopwe tou. Kouno ne fofforengau. Chufengen ren noum pisop. Ese nifinifin met sokkun osukosuk, ka tongeni poracho ngeni ren aier. Ka tongeni winiti nimoch sefan.”<sup>8</sup>

## Wisane ewe Chon Amanau mi Auhea

“Jises Kraist ach Chon Amanau mi unusan auhea ngeni ewe [kokkotun amanau]. Ika esap fan itan an Achasefan, sipwe poutmwanino. Ese naf ach sipwe chok nuku non I me non an misin. Sipwe pwan angang me kaeo, kutta me iotek, aier me echuno. Mi namwot sipwe sinei an Kot kewe annuk me aneasosichir. Mi namwot sipwe angei an angangepin mi amanau. Iei chok usun sipwe angei pwapwa ese much.”<sup>9</sup>

### ESINESIN

1. “The Will Within,” *Ensign*, May 1987, 68.
2. “Choices,” *Liahona*, May 2016, 86.
3. Mosaia 4:2.
4. “The Three Rs of Choice,” *Liahona*, Nov. 2010, 69.
5. “Choices,” 86
6. “Keep the Commandments,” *Liahona*, Nov. 2015, 85.
7. “See Others as They May Become,” *Liahona*, Nov. 2012, 68.
8. “Priesthood Power,” *Liahona*, May 2011, 67.
9. “The Perfect Path to Happiness,” *Liahona*, Nov. 2016, 80–81.

## AFANAFAN SENI EI POROUS

Kich meinisin sise unusoch—seni chok ewe niffangen aier a tufich me ren ewe fangeno an Jises Kraist a tongeni nimetikicheno seni ach tipis me aochueno manauach. Ekieki om kopwe porous ngeni ekkewe ka asukuner ifa usun sipwe “awena ia sipwe feino ia” me ren aier. Ifa usun ra mefi arap ngeni Semach non Nang me Jises Kraist ren siwin mi och ra fen fori non manauer? Ka tongeni tingor ngeni ekkewe ka asukuner ne makkei mettochun ngun ra mochen fori non ewe minafon ier me repwe repotuni ar foffor ngeni emon chiener, punuwer, ika ekkoch chon ar famini usun ar fefeita.

## SERAFO

### Apungano ne Aier

**P**reseten Monson a awewei pwe “wisach pwe sipwe pochuno seni ukukoch ngeni angangoch, seni nipwakingaw ngeni nipwakoch. Ach angang pwe sipwe winiti

murinoch.” Chommong aramas ra finata January ne fori mettoch repwe angang ngeni me mettoch ra mochen aochueno: ne emenimen fan chommong, mwongo mi och, ika kaeo ew minafon sinenap. Nupwen ekkei mettoch sipwe angang ngeni ra tongeni anisuk ne siwin om kopwe ochuno, ewe aan mi murino ne siwin ina seni aier.

Ina mwo pwe aier mi tongeni epwe weires, a ew niffang! Nupwen sia anongonong won Jises Kraist ren ach aier seni ach tipis, sia tufichin marita me fefeita. Preseten Monson a apasa, “Jises Kraist ach Chon Amanau mi unusan auhea ngeni ewe [kokkotun amanau]. Ika esap fan itan an Achasefan, sipwe poutmwanino.” Seni aier, oua tongeni nimenimoch seni ami kewe tipis me fefeita ne winiti usun chok I.

Ekieki och mettoch menin a amwochuk seni om kopwe winiti usun ewe Chon Amanau. Epwe kapasen auom? Ifa usun om mwokutukut ngeni chiechiom ika famini? Mwirin om ekiek usun met ka tongeni aochueno, iotek ngeni Semach won Nang me affata om mochenin siwin. Chemeni pwe seni manamanen An Achasefan, Jises Kraist a tongeni anisuk ne akkufu om apwangapwang. Usun Preseten Monson a aitikich, “Ewe niffangen aier, a kawor me ren ach Chon Amanau, a atufichi kich ach sipwe awena ia sipwe feino ia.”

Nupwen ekkewe mettoch sipwe angang ngeni non ewe minafon ier ra tongeni anisikich ne marita, ewe aan mi murino ne siwin ina seni aier.

Nengeni pwan “Eight Myths about Repentance” (Wanu Ekiek Mi Mwan Usun Aier) non [lds.org/go/1186](https://lds.org/go/1186).

## SEMIRIT

### Aier ew Niffang

**E**we niffangen aier esap ew niffang ka tongeni kuna ika attapa. Nge, ew niffang ka tongeni mefi. Ei wewen pwe nupwen sa fini mettoch mi muan, sia tongeni aier me mefi kinamwe me pwapwa sefan.

Semach won Nang me Jises repwe anisi kich ne aier fansoun meinisin. Chungani ew sasing epwe anapanapa ew me ew sokkun tettenin aier.

Sia mefi niemam.

Sia iotek ngeni Semach won Nang, ureni I met a fis, me tingor An aninis ne finata met mi murino mwirin.

Sia omusomus me sotuni ne aochueno.

Sia mefi kinamwe me sinei pwe sia museno.



# Poporous Ngeni Ese Nifinifin Fansoun, Ekis Meinisin, Non Sokopaten Napanap

*Fefin chon amwa a wewen pwe repwe angang ngeni. Jises a angang ese nifinifin fansoun me ekis meinisin. Sia pwan tongeni fori ena usun.*

Nuku, Famini, Aninis

Ne “angang ngeni” a wewen sipwe awora angang ngeni ekkoch, tumun, me aninis minne epwe awora kinamwe me pwa-pwa ngeni ekkoch. Chon amwa ra kutta aanen ar repwe angang ngeni ekkewe ra churir. Jises Kraist a angang ngeni meinisin—ese nifinifin fansoun me ekis meinisin. A amwongoni ekkewe 5,000, aururu Mary me Martha atun manon mwonger we, me aiti An we kapas allim ngeni ewe fefin ren ewe ito. A fori pokiten An ennetin tong.

Ach tapweno mwirin An nenien appiru, kich chon amwa sia tongeni sinei me tongei emon me emon pwich kewe sia churir, sipwe chemeni pwe tong ina nongonongen mettoch meinisin sia fori. Nupwen sia iotek fan iten memef ren ach sipwe sinei ifa usun sipwe angang ngeni nemineuwe me anisi ne apochokunano an nuku, “ekkewe chon nang rese tongeni kouno seni ar repwe chiechiach.”<sup>1</sup>

Seni ewe tettenin Fin Anisi non 1842 ngeni ikenai, ewe angangen fefin a fen afeiochu manauen aramas. Ren awewe, Joan Johnson, emon 82 ier mi mano punuwan, me chiechian we fefin chon amwa ra churi chon orur we ewe a 89 ier me mi uri semwenin ammat. Ir mi kuna pwe ese auchea ngeni ar repwe churi chon orur we fan ew chok non ew maram, iwe ra pwisin poputa ne cheki nemineuwe iteiten wik ika ren fon.

Ren ekkoch fefin chon amwa, menin ar sentini ew text ika email ne awora pesepes epwe ina ewe mettoch mi murino ne fori fan iten emon pwir non ena maram. Ach pwisin fori nefinach ngeni ekkoch me ausening ren napanapen tong ina auchean fefin chon amwa. Pekin computer ikenai me ach chufengen ne nenefengen a anisi kich ne fori ese nifinifin fansoun, ekis meinisin, me non chommong napanap.<sup>2</sup> Ina angang ngeni usun Jises a fori.

## ESINESIN

1. *Teachings of Presidents of the Church: Joseph Smith* (2007), 454.
2. *Nengeni Handbook 2: Administering the Church* (2010), 9.5.1.

## ***Ekkieki Usun Ei***

Ifa usun sipwe kouno ne aureki usun “met mi aneaong” non chon amwa nge sipwe fen anonga ach ekiek won met mi auchea ngeni emon me emon pwich kewe seni noun kewe chon amwa?

## ***Angang ngeni***

Me nukun ew porous mi fateno, iteiten maran ei peich epwe awora ew sokkonon nongonong ne anisi kich ne angang och ngeni emon me emon. Nupwen oua iotek me kutta ourour, oupwe sinei ewe porousen ngun me angang mi auchea ngeni emon me emon pwich kewe.